



# FORCA JONË

\* \* \* Viti VII • Nr. 70 • 10 Korrik 2018 • Ministria për Forcën e Sigurisë të Republikës të Kosovës \* \* \*

## Në Prishtinë zbulohet pllaka përkujtimore në nderim të ushtarëve të NATO-s

Me një ceremoni shtetërore, nën patronatin e Kryeministrit të Republikës së Kosovës, z. Ramush Haradinaj, më 11.06.2018, në qendër të kryeqytetit të Kosovës në Prishtinë, u bë zbulimi i pllakës përkujtimore në nderim të ushtarëve të NATO-s dhe KFOR-it të rënë në Kosovë që nga 12 qershori 1999. Në këtë aktivitet të pranishëm ishin: Kryeministri Ramush Haradinaj, ministri i FSK-së, Rustem Berisha, komandanti i FSK-së, gjenerallejtënant Rrahman Rama, zëvendës asistenti i sekretarit të NATO-s, John Manza, komandanti i KFOR-it, gjeneral major Salvatore Cuoci, drejtori i NALT-it, gjeneral brigade Ralf Hoffmann, ambasadori i SHBA-ve, Greg Delavie, ambasadori i Mbretërisë së Bashkuar, Ruairi O'Connell, ish-komandantët e KFOR-t, gjeneralët Buhler, De Marnak, etj., ambasadorë të shteteve të akredituar në Kosovë, ministra, deputetë e

mysafirë të tjerë.

Me këtë rast, ministri Berisha tha: „U bënë 19 vite nga koha kur NATO udhëhoqi operacionin për mbështetjen e paqes në Kosovë, operacion ky që ktheu shpresën për liri dhe siguri. 12 qershori i vitit 1999 do të mbetet përjetësisht në historinë më të re të Kosovës, si dita e kthimit të shpresës kur e përjetuam lirinë dhe çlirimin. Që nga ajo ditë Bota dhe miqtë tanë lridashës na ofruan bindjen që ne nuk jemi vetëm në holokaustin që po përjetonim. Me mijëra ushtarë dhe paqeruajtës na ndihmuan të ndalohej gjenocidi ndaj popullit shqiptar dhe bashkërisht të ndërtonim një Kosovë të re, si shtet i pavarur dhe sovran me mundësi të barabarta për të gjithë qytetarët e saj. Monumenti që ndërtuam në kujtim të 15 ushtarëve të rënë që nga viti 1999 e deri më sot është shumë pak për të falënderuar ata që bënë aq shumë për ne, por është gur i garancisë



dhe miqësisë së përhershme ndërmjet Kosovës dhe popujve paqeruajtës në Ushtrinë e NATO-s dhe djemve tanë më të mirë që kontribuan në rrugëtimin drejt lirisë sonë. Në cilësinë e Ministrit të FSK-së, falënderoj nga zemra familjarët e ushtarëve të rënë në krye të detyrës në territorin e Republikës së Kosovës, duke i siguruar ata se do të mbeten përjetësisht pjesa e jona e çmuar drejt paqes dhe prosperitetit. Falënderojmë

NATO-n, KFOR-in dhe shtetet mbështetëse për kontributin e dhënë për një mjedis të qetë e të sigurt, për mbështetjen e vazhdueshme që po japin në zhvillimin e FSK-së. Së bashku Kosova dhe NATO-ja kanë të arritura të shumta dhe me të drejtë mund të krenohemi me arritjet tona të përbashkëta. Memoriali që po zbulojmë sot do të mbetet jo vetëm si testament për ata që kanë bërë sakrificën përfundimtare, por edhe për angazhimin

tonë të përbashkët në interes të ndërtimit të paqes dhe stabilitetit”. Në fund, ministri Berisha falënderoi të gjithë ata që kontribuan në iniciativën dhe në ndërtimin e këtij obelisku, duke u shprehur: “Kemi nderin dhe respektin që përjetësisht ta ruajmë kujtimin për paqeruajtësit tanë, ata që e dhanë jetën për ta ruajtur jetën”. Pas fjalëve përshëndetëse të kryeministrit Haradinaj, komandantit të KFOR-it, gjeneral Cuoci-t dhe zëvendës asistentit të sekretarit të NATO-s, John Manza, u bë zbulimi i pllakës përkujtimore të ushtarëve të KFOR-it dhe NATO-s të rënë në Kosovë. Në Obeliskun me stemë të NATO-s dhe KFOR-it, në gjuhën shqipe, angleze dhe serbe, shkruan: „Në kujtim të burrave dhe grave që kanë shërbyer me partnerët e tyre në KFOR dhe kanë dhënë jetën si rezultat i shërbimit të tyre. Ne nderojmë dhe përkujtojmë sakrificën e tyre.”

## Ministri i FSK-së Rustem Berisha priti në vizitë ministren e Mbrojtjes së Francës, znj. Genevieve Darrieussecq



Ministri i Forcës së Sigurisë së Kosovës (MFSK), z. Rustem Berisha, më 01.06.2018, priti në një vizitë zyrtare me ceremoni ushtarake ministren e Mbrojtjes së Francës, znj. Genevieve Darrieussecq. Ministri Berisha së bashku me ministren e Francës, znj. Darrieussecq kryesuan edhe takimin e përbashkët të dy delegacioneve, ku biseduan për bashkëpunimin e dyanshëm në mes të Kosovës dhe Francës, MFSK-së dhe Ministrisë së Mbrojtjes së Francës si dhe për zhvillimet në fushën e sigurisë në Kosovë, rajon dhe më gjerë. Fillimisht, ministri Berisha e falënderoi ministren Darrieussecq për bashkëpun-

imin dhe për ndihmën që Franca ka dhënë dhe po jep për Kosovën, dhe më pas e njoftoi me zhvillimet e përgjithshme në Ministri dhe në Forcën e Sigurisë së Kosovës, me theks të veçantë për integrimin e gjinisë femërore dhe të komunitetit joshumicë në FSK, si dhe për gatishmërinë e FSK-së që të kontribuoj për paqen dhe sigurinë kudo që ka nevojë, në mënyrë që Kosova të jetë kontribuese e paqes dhe sigurisë.

Gjithashtu, ministri Berisha i shprehu ministres të Mbrojtjes së Francës, znj. Darrieussecq, interesimin për akademitë dhe shkollat ushtarake franceze, me qëllim të shkollimit dhe trajnimit të oficerëve dhe

ushtarëve tanë atje. Ai po ashtu shprehu dëshirën për arritjen e një memorandum bashkëpunimi ndërmjet të dyja vendeve në fushën e sigurisë dhe mbrojtjes, në të cilin do të konkretizoheshin aktivitetet e përbashkëta.

Ndërsa, ministrja e Francës, znj. Darrieussecq, pasi që shprehu falënderimin e saj për pritjen, e përgëzoi ministrin Berisha dhe komandantin e FSK-së gjeneral Ramën për të arriturat e përgjithshme të FSK-së. Ajo nder të tjera tha, se “rajoni i Ballkanit vazhdon të jetë i rëndësishëm për Francën, dhe në vazhdimësi jemi krenarë që kemi kontribuar për vendin tuaj. Franca është e kënaqur me të arriturat e vendit tuaj për të ecur përpara. Bashkëpunimi ndërmjet nesh do të vazhdojë të intensifikohet në të ardhmen. Atasheu ushtarak i sapo akredituar për Kosovën do të jetë urë lidhëse ndërmjet Ministrisë së Mbrojtjes të Francës dhe Ministrisë së FSK-së”. Në fund, të dy ministrat u zotuan për intensifikimin e bashkëpunimit dhe mundësinë e rritjes së këtij bashkëpunimi në të gjitha fushat me interes për të dyja vendet.

## Komandanti i FSK-së gjenerallejtënant Rrahman Rama merr pjesë në Konferencën Vjetore të Ushtrisë Amerikane për Evropë



Komandanti i Forcës së Sigurisë të Kosovës (FSK), gjenerallejtënant Rrahman Rama, nga data 19-21.06.2018, po merr pjesë në Konferencën Vjetore të organizuar nga Ushtria Amerikane për Evropë, që po mbahet në Garmish të Gjermanisë.

Qëllimi i mbajtjes së kësaj konference është thellimi i bashkëpunimit në Programin e Partneritetit Ndërshtetëror. Bashkëpunimi në mes të Kosovës përkatësisht FSK-së dhe Gardës Kombëtare të Ajovës (Iowa), është modeli më i mirë që tregon se si në një periudhë të shkurtër mund të arrihet progres në të gjitha nivelet e zhvillimit profesional të një force.

Komandanti i FSK-së, gjenerallejtënant Rrahman

Rama gjatë kësaj konference takoi shumë liderë dhe shefa të Mbrojtjes të vendeve të Ballkanit Perëndimor, të vendeve Baltike dhe përfaqësues të EUCOM-it. Komandanti i FSK-së gjenerallejtënant Rrahman Rama dhe komandanti i Gardës Kombëtare të Ajovës gjeneral majori Timothy Orr, në forumin e Ballkanit Perëndimor, diskutuan edhe lidhur me mundësitë dhe planet për të ardhmen në kuadër të zgjerimit dhe thellimit të aktiviteteve, përfshirë qasjen rajonale, ndërtimin e aftësive dhe trajnimet e përbashkëta në kuadër të bashkëpunimit rajonal. Konferenca vjetore e organizuar nga Ushtria Amerikane për Evropë, pritet që sot t'i përfundojë punimet.



## Ministri dhe komandanti i FSK-së priten në takime të ndara komandantin e operacioneve speciale të NATO-s

Ministri i Ministrisë për Forcën e Sigurisë së Kosovës, z. Rustem Berisha dhe komandanti i FSK-së, gjenerallejtënant Rahman Rama pritën më 28.06.2018 në Ministri, komandantin e Operacioneve Speciale të NATO-s, nën-admiralin Colin Kilrain. Fillimisht, ministri Rustem Berisha dhe komandanti i Operacioneve Speciale të NATO-s biseduan mbi situatën e sigurisë në Kosovë, rajon dhe më gjerë, si dhe u bisedua për kapacitetet institucionale të vendit në fushën e sigurisë, me theks të veçantë mbi zhvillimin, profesionalizimin, avancimin si dhe bashkëpunimet e FSK-së me shtetet anëtare dhe atyre partnere të NATO-s. Gjithashtu, ministri Berisha e njoftoi nën-admiralin

Kilrain për misionin, detyrat, kapacitetet dhe angazhimin e Forcës për integrimin e komuniteteve, në veçanti të komunitetit serb, pastaj integrimin e gjinisë femërore dhe angazhimin në rritjen e shkallës së ndërveprueshmërisë me institucionet emergjente vendore ashtu edhe ato nga vende partnere. Më pas z. Berisha i shprehu mysafirit të lartë nga NATO-ja gatishmërinë operacionale dhe profesionale të FSK-së, që me disa kapacitete specilistike të marrë pjesë edhe në misione paqeruajtëse për të dhënë kontribut në ruajtjen e paqes kudo që ka nevojë. Ministri Berisha në fund të takimit me nënadmiralin Kilrain edhe një herë përsëriti orientimin euroatlantik të Kosovës dhe të FSK-së si Forcë e gatshme, e besueshme,



shumetnike dhe e përfaqësuar nga të gjithë qytetarët e vendit. Ndërsa në takimin e Komandantit të Forcës së Sigurisë së Kosovës, gjenerallejtënant Rahman Rama me komandantin e NATO-s për Operacione Speciale, nënadmiralin Colin Kilrain u bisedua për ngritjen, zhvillimin, profesionalizimin, shkolli-met, trajnimet dhe pjesëmarrjen në ushtrime të përbashkëta qoftë në rajon e më gjerë, e gjithashtu edhe mbi të arriturat në ngritjen e shkallës së ndërveprueshmërisë së FSK-së me ushtritë e rajonit, ato të shteteve anëtare të NATO-s dhe vendeve partnere. Vizita e nënadmiralit Kilrain vazhdoi në Regjimentin e Mbrojtjes Civile të FSK-së për të parë nga afër kapacitetet profesionale dhe pajisjet e kësaj njësie.

## Komandanti i FSK-së priti komandantin e Komandës së Forcave të Përbashkëta Aleate për Evropë



Komandanti i Forcës së Sigurisë së Kosovës, gjenerallejtënant Rahman Rama së bashku me komandanten e Komandës së Doktrinės dhe Stërvitjes (KDS) të FSK-së, gjeneral brigade Ir-fete Spahiu, në kazermën „Skënderbeu” në Ferizaj, më 28.06.2018, pritën në vizitë, komandantin Komandës së Forcave të Përbashkëta Aleate për Evropë në Napoli, Admiralin James Foogo i cili shoqërohej nga komandanti i KFOR-it, gjeneral major Salvatore Cuoci. Në takimin e përbashkët të gjeneral Ramës, gjeneral Spahiut dhe Admiralit Foggo u bisedua për misionin, detyrat dhe të arriturat e Forcës së Sigurisë së Kosovës, zhvillimin dhe profesionalizimin, bashkëpunimet me institucionet tjera partnere si në rajon ashtu edhe me partnerët strategjik si dhe për objektivat për zhvillimin dhe avancimin e kësaj Force në të ardhmen si një institucion i të gjithë qytetarëve, në dobi dhe interes të vendit tonë dhe partner i besueshëm i shteteve mike të Kosovës. Gjenerali amerikan u njoftua gjithashtu edhe për misionin dhe detyrat e Komandës së Doktrinės dhe Stërvitjes, si institucion i cili trajnon, shkollon dhe stërvit pjesëtarët e FSK-së për shërbim në detyra specifike në njësitë e Forcës së Sigurisë së Kosovës, si dhe zhvillon profesionalizimin e pjesëtarëve tanë të cilët në institucione shkollore, trajnuese dhe garuese ndërkombëtare po tregojnë rezultate të shkëlqyera. Për admiralin Foogo, në pjesën e dytë të vizitës u paraqit një material informues, ku u prezantua struktura, organizimin dhe të arriturat e KDS-së, me theks të veçantë stërvitjet në qendrat stërvitore dhe përgatitja e pjesëtarëve të FSK-së për të ardhmen e tyre profesionale.



MINISTRIA PËR FORCËN E SIGURISË SË KOSOVËS  
MINISTARSTVO ZA KOSOVSKE BEZBEDNOSNE SNAGE  
MINISTRY FOR THE KOSOVA SECURITY FORCE

## Auditi i Përgjithshëm vlerësoi lart performancën e menaxhimit të Ministrisë për Forcën e Sigurisë së Kosovës

Ministria për Forcën e Sigurisë së Kosovës në bazë të raportit të Auditimit të Përgjithshëm të Qeverisë së Kosovës, për vitin paraprak 2017, del se „prezanton një pamje të drejtë dhe të vërtetë në të gjitha aspektet materiale, në përputhje me Standardet Ndërkombëtare të Kontabilitetit për Sektorin Publik”.

Për gjetjet e përgjithshme nga pasqyrat financiare vjetore të Ministrisë për FSK-në, Auditori i Përgjithshëm është –Opinion i pamodifikuar- që nënkupton se:

„Pasqyrat Financiare Vjetore për vitin e përfunduar më 31 dhjetor 2017, prezantojnë një pamje të drejtë dhe të vërtetë në të gjitha aspektet materiale, në përputhje me Standardet Ndërkombëtare të Kontabilitetit për Sektorin Publik (sipas kontabilitetit të bazuar në para të gatshme), Ligjin nr. 03/L-048 për Menaxhimin e Financave Publike dhe Përgjegjësitë (me plotësime dhe ndryshime) dhe Rregulloren MF, nr. 01/2017 për raportim vjetor financiar nga organizatat buxhetore”. Më tej në raport konstatohet se: „Konkluzioni për menaxhimin financiar dhe kontrollin

në MFSK në përgjithësi ka vendosur kontrole të mira në raport me obligimet statuto-re të saj. Menaxhimi financiar dhe kontrolli kanë dëshmuar proces të mirë të rishikimit dhe siguri në zbatimin e legjislacionit dhe proceseve tjera të kontrollit. Aranzhimet e qeverisjes në lidhje me raportimin menaxhe-rial dhe llogaridhënien, si dhe menaxhimin e rrezikut pasqyron një situatë pozitive. MFSK ka zbatuar pjesën më të madhe të rekomandimeve të Auditorit të Përgjithshëm (AP), si dhe ka përgatitur raportin e menaxhimit të rrezikut duke identifikuar të gjitha rreziqet domethënëse që mund të kenë ndikim tek organizata në lidhje me arritjen e objektivave të saj” thuhet në raportin e Auditit të Përgjithshëm”.

Ministria për Forcën e Sigurisë së Kosovës dhe stafi i lartë drejtues ndihen krenarë me këto vlerësime të Auditit të Përgjithshëm, po ashtu jemi të vetëdijshëm se ka vend për më shumë dhe më mirë, sidomos duke u fokusuar në të ardhmen në përmirësimin e gjetjeve të cilat do ta ngritin edhe më lartë këtë per-formancë të Ministrisë për FSK-në.



## Deputetët e Parlamentit të Gjermanisë vizituan Ministrinë për Forcën e Sigurisë së Kosovës

Ministri i Forcës së Sigurisë të Kosovës, z. Rustem Berisha priti më (21.06.2018) në ministri një delegacion të deputetëve të Parlamentit të Republikës Federale të Gjermanisë, anëtarë të Komisionit Parlamentar të Mbrojtjes, në krye me z. Wolfgang Hellmich. Në takim me z. Hellmich, u bisedua për marrëdhëniet e shkëlqyera ndërshtetërore, Kosovë-Gjermani, në shumë fusha e me theks të veçantë në fushën e sigurisë. Në fillim, ministri Rustem Berisha e falënderoi shtetin dhe popullin gjerman për mbështetjen e pakursyer që kanë dhënë dhe po japin për Kosovën, në ndërtimin, avancimin e institucioneve, me theks të veçantë në fushën e sigurisë si dhe profesionalizimin



dhe avancimin e FSK-së. Ministri Berisha gjithashtu theksoi rolin mjaft të rëndësishëm të Gjermanisë në shkollimin, trajnimin dhe pajisjen e FSK-së, si dhe në përgjithësi rolin mjaft aktiv të Ministrisë së Mbrojtjes dhe Forcave të Armatosura të Gjermanisë si një partner strategjik dhe i fokusuar

në situatën në Kosovë, që nga viti 1999 e deri më tani. Ministri Berisha i njoftoi deputetët gjermanë për misionin, detyrat, të arriturat, sfidat si dhe objektivat për zhvillimin dhe avancimin e FSK-së në të ardhmen, duke përmendur trajnimet dhe shkollimet si brenda ashtu edhe jashtë vendit të

pjesëtarëve të FSK-së, pjesëmarrjen në stërvitje të përbashkëta me partnerët tanë, integrimin e komuniteteve joshumicë dhe të gjinisë femërore, si dhe mbi objektivat e FSK-së për të ardhmen, për arritjen e së cilave rol të rëndësishëm padyshim luan edhe shteti i Gjermanisë. Gjithash-

tu edhe zv. ministri i MFSK-së, Burim Ramadani para deputetëve gjermanë prezantoi planet dhe objektivat për një Kosovë të sigurt si dhe shpalosi faktet dhe rrugën lidhur me përpjekjet politike për gjithëpërfshirje. Nga ana e tij, kryetari i Komitetit të Mbrojtjes pranë Bundestagut Gjerman, z. Wolfgang Hellmich tha se Gjermania do të mbështesë Kosovën edhe më tutje: „Ju mund të llogarisni në mbështetjen tonë edhe më tutje“. U shpreh gjithashtu se do të angazhohen që të gjejnë edhe më shumë fusha konkrete bashkëpunimi, si dhe shprehu gatishmëri për thellimin e këtij bashkëpunimi edhe në të ardhmen. Kjo ishte vizita e parë e Komitetit të Mbrojtjes të Parlamentit Federal të Gjermanisë, prej se ministri Berisha është emëruar në krye të Ministrisë për Forcën e Sigurisë së Kosovës.

## Gjenerali Gëzim Hazrolli qëndroi për vizitë zyrtare në Gjermani



Drejtori i Drejtorisë për Operacione në Ministrinë për Forcën e Sigurisë së Kosovës, gjeneral majori Gëzim Hazrolli, me ftesë zyrtare, nga 17-22.06.2018, ka qëndruar për vizitë në Forcat e Armatosura të Republikës Federale të Gjermanisë. Gjeneral Hazrolli është pritur nga gjeneral brigade Oliver Kohl, komandant i Akademisë së Udhëheqësve në Hamburg. Gjatë vizitës në Akademinë e Udhëheqësve u bisedua për përvojat, praktikën dhe programet arsimore dhe zhvillimore të këtij institucioni si dhe mundësitë për zgjerimin e fushave të bashkëpunimit në të ardhmen që do të ishin në interes të shkollimit të pjesëtarëve të FSK-së. Gjithashtu, gjeneral Hazrolli ka vizituar edhe Qendrën për Udhëheqje të Brendshme të Bundesverit në Ko-

blenz, ku u prit nga drejtori i Qendrës, gjeneral majori Reinhardt Zudrop me të cilin biseduan për mundësitë dhe kapacitetet trajnuese që ofron kjo qendër për shkollimin dhe trajnimin e ushtarakëve por edhe për kapacitetet që ofron kjo Qendër për FSK-në dhe shkollimin e pjesëtarëve të saj. Nga të dy qendrat gjeneral Hazrolli mori mbështetje për gatishmërinë e vazhdimin të bashkëpunimit dhe përkrahjes së FSK-së drejt avancimit dhe ngritjes profesionale. Ministria për Forcën e Sigurisë së Kosovës, përkatësisht Forca e Sigurisë së Kosovës dhe Ministria e Mbrojtjes dhe Forcat e Armatosura të Gjermanisë kanë marrëdhënie shumë të mira bilaterale si dhe aktivitetet vjetore në kuadër të këtij bashkëpunimi janë të shumta.

## Mbahet punëtorja „Ngritja e Kapaciteteve për Forcimin e Transparencës, Përgjegjshmërisë dhe Integritetit në Sektorin e Sigurisë“



Nën udhëheqjen e ekspertëve të NATO-s, Ministrisë së Mbrojtjes të Norvegjisë dhe atyre të KFOR-it, më 14 qershor 2018, u mbajt punëtorja e radhës „Ngritja e Kapaciteteve për Forcimin e Transparencës, Përgjegjshmërisë dhe Integritetit në Sektorin e Sigurisë“. Punëtorja u mbajt në kuadër të rritjes së bashkëpunimit NATO-Kosovë. Pjesëmarrës në këtë punëtori ishin menaxherë të segmenteve dhe fushave nga institucionet e sigurisë në vend. Në sesionin e parë të punimeve të kësaj punëtorie morën pjesë: ministri i FSK-së Rustem Berisha, komandanti i FSK-së gjenerallejtënant Rrahman Rama, sekretari i përgjithshëm Shkelzen Sylaj dhe drejtori i Ekipit Këshillues dhe Ndërlidhës i NATO-s për MFSK/FSK, gjeneral brigade Ralf Hoffmann. Ministri Berisha në fjalën e hapjes tha: “Është shumë inkurajues fakti që po shohim një pjesëmarrje kaq të gjerë dhe aktive dhe një interesim të lartë nga institucionet e Kosovës për temën e kësaj punëtorie. Udhëheqësit e FSK-së janë të vetëdijshëm se integriteti institucional publik është parakusht për një shoqëri funksionale. Rendësi të veçantë i kemi kushtuar ngritjes dhe forcimit të integritetit në MFSK, e cila synon anëtarësimin në NATO. Ndërtimi i Integritetit dhe Qeverisja e Mirë në Sektorin e Sigurisë është interes i përbashkët në kornizën e ndërveprimit të

avancuar NATO-Kosovë”. Sekretari i përgjithshëm Shkelzen Sylaj, në fjalën e tij, tha se Integriteti në MFSK/FSK tanimë është bërë vlerë dhe standard në institucionin tonë, vlerë kjo e krijuar në përkrahje të partnerëve tanë strategjikë dhe ndihmës së miqve tanë ndërkombëtarë, duke mos harruar asnjëherë angazhimin e palodhshëm të të gjithë personelit, si dhe mbështetjen pa rezervë të ministrit të MFSK-së, z. Berisha. Në fund, z. Sylaj edhe njëherë konfirmoi gatishmërinë e MFSK/FSK-së që të ofrojë për institucionet tjera vendore të gjitha kapacitetet profesionale në implementimin e Planit të Integritetit 2019-2022 si dhe ekspertizën tonë në hartimin e planeve të integritetit, në përkrahje të të gjitha institucioneve të Qeverisë së Republikës së Kosovës. Ndërsa, drejtor i NALT-it, gjenerali Hoffmann vlerësoi lartë angazhimin e MFSK/FSK-së në avancimin e implementimit të Planit të Integritetit: “Kjo ngjarje po zhvillohet mbi suksesin e konferencës për ndërtimin e integritetit të mbajtur më 18 nëntor 2017 në Prishtinë, organizuar nga Ministria për FSK-në. Pjesëmarrja aktive dhe interesimi për këtë temë është inkurajim dhe ne duam të vazhdojmë bashkëpunimin tonë me institucionet e Kosovës në fushën e Qeverisjes së Mirë dhe Ndërtimit të Integritetit. Kjo temë është e rëndësishme për NATO-n”.

## Policia e FSK-së zuri vendin e tretë në garën për forcimin e ligjit

Në kampin e KFOR-it amerikan në Bondsteel (Ferizaj), dje më 20.06.2018 u mbajtën gara testuese të ekipeve të njëjësive të forcimit të ligjit në Kosovë dhe të vendeve partnere, për përgatitjen e tyre fizike dhe psikike si dhe detyra tjera policore. Të gjitha ekipet pjesëmarrëse gjatë testimeve/garave kanë kaluar nëpër këto disiplina: gjatë aktive, fitnes fizik, shkathtësi të ngasjes emergjente, gjatë nën presion me pistoletë 9mm, ndalesë të trafikut me rrezikshmëri të lartë, shkathtësi të angazhimit në vend-incident dhe neutralizimin e një personi. Në këtë garë morën pjesë

gjashtë ekipe të forcimit të ligjit: Policia e Forcës së Sigurisë të Kosovës, Policia Ushtarake Ndërkombëtare e KFOR-it, Policia e Kosovës, Policia Kufitare e Kosovës, Policia Ushtarake Gjermane dhe Policia Ushtarake Amerikane. Ekipi i Policisë së Forcës të Sigurisë së Kosovës zuri vendin e tretë, duke u radhitur mbas Ekipit të Policisë Ushtarake Amerikane (vend i parë) dhe Policisë Ushtarake Ndërkombëtare nga KFOR-i (vend i dytë). Komandanti i Kampit Bondsteel, koloneli Nick Ducic, në fund, ekipeve fituese u dhuroi mirënjohje dhe medalje për suksesin e treguar gjatë kësaj gare.



## Biza-Shqipëri

# Komandanti i FSK-së, gjeneralallejtënant Rrahman Rama përcolli ushtrimin fushor të BRSH-së „Biza - 2018”



Batalioni i Parë i Brigadës së Reagimit të Shpejtë të FSK-së, nga 3 qershor deri më 12 qershor 2018, realizoi ushtrimin fushor të koduar „Biza-2018” në poligonin ushtarak Biza të Republikës së Shqipërisë. Në këtë ushtrim morën pjesë mbi 350 ushtarë me 30 automjete.

Qëllimi i këtij ushtrimi është vlerësimi i performancës operuese të kompanive të Batalionit, në një

situatë komplekse të sigurisë dhe emergjencës me qëllim të certifikimit të tyre për operacionet MAC dhe OMP, si dhe testimit të aftësisë së BN për zbarkim dhe vetë qëndrueshmëri të operacioneve. Për të përcjellë nga afër zhvillimet e ushtrimit fushor të Batalionit të Parë të BRSH-së, dje (12.06.2018) në Biza, qëndruan komandanti i Forcës së Sigurisë së Kosovës gjeneralallejtënant Rrahman Rama,

komandanti i Brigadës për Reagim të Shpejtë, gjeneral brigade Fadil Hadërgjonaj, kolonel Jeton Dreshaj, shef i Kabinetit të Komandantit të FSK-së, atasheu ushtarak i Kosovës në Republikën e Shqipërisë, koloneli Bashkim Shillova, komandanti i Batalionit të Parë të BRSH-së, majori Berat Shala dhe Jashar Ramadani shef i Kabinetit të Ministrit Rustem Berisha.

Komandanti i FSK-së, gjeneralallejtënant Rrahman Rama përgëzoi stafin udhëheqës dhe Batalionin e Parë, për realizimin e objektivave gjatë ushtrimit fushor „Biza 2018”, si dhe falënderoi ushtrinë shqiptare për përkrahjen dhe për mundësinë e realizimit të këtij ushtrimi.

Komandanti i FSK-së, gjeneral Rama para të pranishmëve tha: „Ju përgëzoj për të gjitha të arriturat gjatë realizimit të ushtrimit fushor „Biza 2018”. Mendoj dhe besoj se qëllimi dhe synimi juaj

është arritur me sukses. Gjithashtu e di se keni pasur vështirësi në përshtatje me një ambient të tillë. Qëllimi kryesor i ushtrimit ka qenë sfidimi i vetvetes, vetë qëndrueshmëria dhe komandimi dhe kontrolli, dhe këtë e keni arritur. Pra, jeni një batalion model për të tjerët dhe të vazhdoni për të avancuar më tutje, në të ardhmen. Kërkoj që të jeni të ndërveprueshëm edhe me partnerët tanë. Ky është misioni juaj, këtë e keni zg-

jedhur që nga faza e planifikimit dhe ekzekutimit. Megjithatë është arritur qëllimi, nuk duhet të jemi të vetëkënaqur, por duhet të jemi në hap me zhvillimet më të reja, pra në hap me kohën. Realizimi i këtij ushtrimi është një arritje e madhe e jona, dhe unë kërkoj nga ju që këto njohuri të reja me përgjegjësi të lartë t'i bartni te të tjerët”. Batalioni i Parë i BRSH-së, sot e përfundon ushtrimin fushor „Biza-2018”.



## Komandanti i Operacioneve Speciale të NATO-s vizitoi Regjimentin e Mbrojtjes Civile të FSK-së

Në admiral Colin Kilrain, komandanti i Operacioneve Speciale të NATO-s i shoqëruar nga komandanti i Forcës së Sigurisë së Kosovës, gjeneralallejtënant Rrahman Rama përrollën dje (29.06.2018) nga afër trajnimin „Niveli i parë për zhytje” të FSK-së, në liqenin e Batllavës. Për delegacionin e lartë një material prezantues rreth trajnimit e paraqiti drejtori i Qendrës së Trajnimit për Kërkim-Shpëtim të FSK-së, John Doone si dhe shefi i QRTKSH, kapiten Besnik Hasani, të cilët folën për rëndësinë e këtij trajnimi, që është realizuar në



tri lokacione, Pomozotin (pjesa teorike), Banjë të Malishevës dhe Batllavë (pjesa praktike e trajnimit). Shefi i instruktorëve, kapter Valdrin Kelmendi tregoi për ecurinë e trajnimit që realizohet me qëllim të ngritjes së numrit të zhytësve në kuadër të FSK-së. Në këtë trajnim intensiv, me pjesëmarrje nga të gjitha njësit e FSK-së. Vizita e nën-admiralit dhe gjeneral Ramës ka vazhduar edhe në ambientet e kazermës „Evropianët e rinj” në Pomozotin, ku është bashkuar edhe komandanti i Gardës Kombëtare të shtetit të Ajovës së SHBA-ve, gjeneral ma-

jor Timothy Orr. Në Pomozotin ata u pritën nga komandanti i Regjimentit të Mbrojtjes Civile(RMC), kolonel Shaip Haziri si dhe të gjithë së bashku vizituan hapësirat, poligonet e trajnimit dhe objektet e kazermës, dhe në veçanti ato të Qendrës së Trajnimit për Kërkim-Shpëtim, e cila mëton të funksionojë si Qendër Regionale e Trajnimit për Kërkim-Shpëtim, në të cilën që nga viti i kaluar janë realizuar trajnime për Policinë e Kosovës, për pjesëtarët e Forcave të Armatosura të Republikës së Shqipërisë etj.

## Në KDS certifikohen kursantët për instruktorë të taktikave

Në kazermën „Skënderbeu” të Komandës së Doktrinës dhe Stërvitjes të FSK-së, në Ferizaj, më 11.06.2018, u mbajt ceremonia e certifikimit të trajnimit „Kursi Ndërkombëtar për Instruktorë të Taktikave” në të cilin morën pjesë 39 pjesëtarë të njësive të ndryshme të FSK-së. Kursi ka qenë i mbyllur dhe ka zgjatur tri javë. Instruktorët ishin nga Ushtria e Mbretërisë së Bashkuar.

Në këtë ceremoni të pranishëm ishin komandanti i Forcës Tokësore, gjeneral brigade Enver Cikaqi, ambasadori i Mbretërisë së Bashkuar Ruari O’Conell, komandanti i Komandës së Doktrinës dhe Stërvitjes gjeneral brigade Irfete Spahiu, atasheu ushtarak i Mbretërisë së Bashkuar në Kosovë koloneli Sainthrophe, si dhe oficerë të lartë të FSK-së.

Në fjalën e tij, ambasadori i Mbretërisë së Bashkuar Ruari O’Conell, pos tjerash, tha: „FSK-ja dhe Ushtria e Mbretërisë së Bashkuar janë duke bashkëpunuar në

mënyrë të shkëlqyeshme dhe se ky angazhim i madh është duke dhënë rezultate konkrete”. Ai gjithashtu shprehu gatishmërinë që ky bashkëpunim të vazhdojë dhe në të ardhmen, duke u shprehur: „gjithë ky mund do të shfaqet në të ardhmen gjatë aktiviteteve të FSK-së”.

Komandanti i Forcave Tokësore, gjeneral brigade Enver Cikaqi, me këtë rast i përgëzoi kursantët e FSK-së për rezultatet e arritura dhe për disiplinën e treguar në këtë trajnim, ndërsa instruktorët nga Mbretëria e Bashkuar i falënderoi për përkushtimin dhe punën që kanë bërë gjatë këtij trajnimi me pjesëtarët e FSK-së. Në fund të ceremonisë, komandanti i Komandës së Doktrinës dhe Stërvitjes, gjeneral brigade Irfete Spahiu, kursantëve u dha certifikata, kurse instruktorëve mirënjohje për angazhimin profesional të tyre gjatë mbajtjes së trajnimit.





*Në Komandën e Doktrinës dhe Stërvitjes në Ferizaj*

# Diplomoi gjenerata 2018 e kadetëve të Forcës së Sigurisë së Kosovës



gjenerallejtënant Rrahman Rama, komandanti i Gardës Kombëtare të Ajovës së (SHBA) gjeneral majori Timothy Orr, zv. komandanti i KFOR-it, gjeneral major Janos Csombok, drejtori i Ekipit Këshillues dhe Ndërlidhës i NATO-s për FSK, gjeneral brigade Ralf Hoffman, komandanti i Komandës së Forcave Tokësore (KFT), gjeneral brigade Enver Cikaqi, komandanti i Komandës së Doktrinës dhe Stërvitjes (KDS), gjeneral brigade Irfete Spahiu si dhe gjeneralë e oficerë të FSK-së, KFOR-it, familjarë të kadetëve etj.

Pas pjesës ceremoniale, rreshtimit të kadetëve, intonimit të himnit shtetëror, fjalën e rastit e mbajti ministri Rustem Berisha i cili me këtë rast tha: „Gjatë kësaj periudhe 4 vjeçare ju keni kaluar nëpër sfida të shumta të cilat falë punës, angazhimit dhe vendosmërisë ju keni përfunduar me sukses dhe nga sot po gradoheni me gradën e nëntogerit. Gradimi i juaj në oficer të FSK-së po bëhet në një fazë shumë të rëndësishme të zhvillimit të FSK-së, kur edhe pritet që kjo Forcë t’i avancoj kapacitetet operacionale dhe ta ndryshojë misionin e saj. Ky standard i arritur



është një shembull i qartë i zhvillimit dhe progresit që po e bënë FSK-ja me profesionalizëm dhe në arritje të standardeve më të larta ushtarake të NATO-s.” Në fund të fjalës së tij, ministri Berisha iu drejtua kadetëve; „Të dashur kadet, nuk ka mision më të shenjtë se sa kontributi për vlerat e lirisë dhe sigurisë andaj ju dëshiroj suksese në këtë rrugëtim, po ashtu një falënderim i veçantë edhe për familjet e juaja të cilat ju kanë qëndruar dhe mbështetur në vazhdimësi”.

Ndërsa, komandanti i Komandës së Doktrinës dhe Stërvitjes, gjeneral brigade Irfete Spahiu, foli

për detyrat, rolin dhe rëndësinë e oficerëve në institucionin tonë, me ç’rast tha: „Të jesh oficer është detyrë jo e lehtë, që përkon me shumë sfida dhe përgjegjësi. Dhe sa më lartë që shkoni në karrierë, privilegjet tuaja rriten por njëherë edhe përgjegjësitë dhe detyrat tuaja shumëfishohen. Jo më kot thuhet, që një lider duhet të jetë, të dijë dhe të bëjë. Të jetë me vlera ushtarake dhe attribute mentale, fizike e emocionale; të dijë aftësitë ndër-personale, konceptuale, teknike dhe taktike, si dhe të bëjë influencimin, drejtimin dhe përmirësimin e vartësve të vet”. Ajo, në fund të fjalës së saj, pos tjer-

ash, tha: „ QSU-ja ishte dhe vazhdon të mbetet institucioni edukativo-arsimor kredibil ngase gjatë këtyre viteve, ajo ka dëshmuar gatishmërinë, përkushtimin dhe disiplinën për të përmbushur misionin e saj. Nga kjo qendër kanë dalë shumë oficerë të rinj, të cilët tashmë janë pjesë e çdo angazhimi dhe njësie të suksesshme, shkolimi i të cilëve është bërë sipas standardeve të NATO-s”.

Diplomat për kadetët e sapo diplomuar i ndanë: ministri Berisha, gjenerali Orr, gjenerallejtënant Rrahman Rama, gjeneral brigade Irfete Spahiu dhe kapiteni Vegim Krelani. Kadeti Premtim Shaqiri u dekorua me „Medalje” për rezultate të larta në përvetësimin e programit akademik. Me gradën nëntoger u graduan: Klevis Elezaj, Bajram Geci, Defrim Kurti, Kreshnik Dreshaj, Valdrin Pollomi, Arlind Osmani, Meriton Haxholli, Erblin Çoçaj, Shkelqim Raci, Argjend Lokaj dhe Premtim Shaqiri. Nga sot FSK-së iu shtuan edhe 11 oficerë të rinj të cilët shërbimin do ta fillojnë me gradën nëntoger dhe se do të sistemohen në detyrat e punës, në të gjitha njësitë e FSK-së.

## Komandanti i FSK-së, dekoroi me medalje „Shërbim vetëmohues” pjesëtarët e Kërkim-Shpëtimit të FSK-së



Në një ceremoni të organizuar në Regjimentin e Mbrojtjes Civile, më 05.06.2018, komandanti i Forcës së Sigurisë së Kosovës gjenerallejtënant Rrahman Rama ka dekoruar me medaljen „Shërbim Vetëmohues” pjesëtarët e Task Forcës së Kërkim-Shpëtimit.

„Unë ju përgëzoj për punën dhe angazhimin tuaj. E di dhe e kuptoj se në çfarë kushtesh ju veproni dhe çfarë rrezikshmërie keni në punën tuaj. Kam qenë vet i pranishëm gjatë kërkimit të dy policëve të aksidentuar në Kaçanik.

Po ashtu kërkimi dhe gjetja e viktimës vikendin e kaluar tregon për punën dhe angazhimin serioz që ju jeni duke e bërë. Shpresoj që kurrë mos të kemi thirrje për angazhimin tuaj, se e di sa e vështirë është të gesh dhe të tërheqësh një viktimë, por ju e keni treguar me punën tuaj se jeni të gatshëm dhe të përgatitur për çdo situatë” tha ndër të tjera në fjalën e tij, gjeneral Rama.

Në fund të ceremonisë të gjithë pjesëtarëve iu ndanë medalje për „Shërbim Vetëmohues.”

## Certifikohen pjesëmarrësit e trajnimit „Menaxhimi taktik i traumave”

Në kazermën „Adem Jashari” të FSK-së, më 08 qershor 2018, u zhvillua ceremonia e certifikimit të 15 pjesëtarëve të FSK-së dhe Policisë së Kosovës, të cilët kryen trajnimin dyjavorë-cikli i tretë, me temë: „Menaxhimi taktik i traumave” (Ndihma e parë e avancuar). Trajnimi është mbështetur nga Ambasada e SHBA-ve, përkatësisht Zyra për Mbështetje Civile-Ushtarake (CMSE) dhe është zhvilluar nga instruktorë të Forcës së Sigurisë së Kosovës. Në ceremoninë e certifikimit, gjenerali Xhevahir Geci, në fjalën e tij, tha: „Ndihej i nderuar që sot jam pjesë e kësaj ceremonie përmbyllëse. Dua të përmend bashkëpunimin e shkëlqyer që ka FSK-ja me Policinë e Kosovës dhe Ambasadën Amerikane që është një tregues i qartë i progresit që kemi sot si FSK”. Trajnimi është realizuar nga Kompania e Mjekësisë e FSK-së në koordinim me Zyrën Mbështetëse Civile-Ushtarake të Ambasadës së SHBA-së dhe ka për qëllim avancimin e FSK-së në ndërveprueshmëri me institucionet tjera.

Duke iu drejtuar kursantëve, gjeneral Geci, shtoi: „Të nderuar kursantë, kërkoj nga ju, që me njohuritë që i keni fituar të jeni përgatitur mjaftueshëm për të intervenuar në rastet reale kur do që kërkohet ndihma juaj. FSK-ja vlerëson lartë angazhimin e

Ambasadës së SHBA-ve, andaj unë si zv. komandant i Forcave Tokësore falënderoj Ambasadën Amerikane për kontributin e vazhdueshëm që po jep në ngritjen e kapaciteteve operacionale të FSK-së dhe institucionet tjera të sigurisë në Kosovë”.

Me një fjalë u paraqit edhe drejtori i Policisë Kufitare për rajonin e Mitrovicës, nënkolonel Mentor Shabani i cili tha: „Në fazën e projekti të përbashkët në mes të FSK-së dhe Ambasadës Amerikane, ku pjesëtarët e Policisë po trajnohen në aspektin elementar të ndihmës së parë mjekësore, që është element i cili i ka munguar organizatës sonë”.

Kurse përfaqësuesi i Ambasadës nga Zyra Ndërlidhëse Civilo-Ushtarake, kapiteni Justin Bauer falënderoi kursantët dhe të pranishmit, duke thënë: Gjatë këtyre dy javëve ju keni mësuar shumë shkathtësi të reja për të shpëtuar jetë. Unë shpresoj se ju kurrë nuk do të ndodheni në situata të tilla, por edhe nëse ndodheni unë jam i kënaqur që ju i keni fituar këto shkathtësi. Në fund u ndanë certifikatat për të gjithë pjesëtarët që përfunduan trajnimin dhe gjithashtu u certifikuan edhe dy pjesëtarë të FSK-së, të cilët kanë ndjekur kursin „Parandalimi i vetëvrasjeve” në kampin Bondsteel.



## FSK-ja nderon me medalje atasheun e Mbrojtjes të SHBA-ve, majorin Juan Murillo

Në auditorin e Ministrisë për Forcën e Sigurisë së Kosovës (MFSK), më 08.06.2018, u organizua ceremonia përcjellëse, me rastin e kryerjes së detyrës së atasheut të Mbrojtjes të SHBA-së, e majorit Juan Murillo. Të pranishëm në ceremoni ishin; ministri i FSK-së Rustem Berisha, komandanti i FSK-së gjenerallejtënant Rrahman Rama, zëvendësministri Agim Çeku, sekretari i përgjithshëm Shkëlzen Sylaj, gjeneralmajori Zymer Halimi, gjeneral brigade Enver Cikaqi, gjeneral brigade Irfete Spahiu, gjeneral brigade Naim Haziri, atasheu ushtarak i SHBA-së, kolonel Jeffrey Fisher si dhe zyrtarë të ministrisë, oficerë të NALT-it, të KFOR-it dhe të FSK-së.

Ministri Berisha, pasi përshëndeti të pranishmit e falënderoi atasheun ushtarak të SHBA-ve majorin Juan Murillo për kontributin, përkushtimin dhe angazhimin profesional gjatë kohës së shërbimit të tij në MFSK. Më tej, ministri Berisha u shpreh: „Ky takim është organizuar për nder të atasheut të Armatës së SHBA-së, majorit



Juan Murillo, i cili po e përmbyll misionin e tij dy vjeçar në mbështetje të MFSK/FSK-së, duke ofruar asistencë profesionale dhe duke zbatuar politikat e shtetit më të fuqishëm në botë, aleatit dhe partnerit tonë kryesor strategjik, sponsorit të lirisë dhe shtetit që po e ndërtojmë sot”. Ministri Berisha duke iu drejtuar atasheut të Mbrojtjes, tha: „Me sado shumë fjalë që përpiqem t’ju vlerësoj Ju dhe punën Tuaj të çmuar që keni bërë për FSK-në gjatë këtij mandati, nuk do të mund

t’i themi më mirë nga sa thonë vet gjurmët e punës Tuaj profesionale në procesin e ndërtimit të kapaciteteve mbrojtëse të Kosovës. Ne jemi të inkurajuar në këtë proces për shkakun se mbështetja e SHBA-ve në vazhdimësi na obligon që shumë shpejt të jemi kontribuues në ndërtimin dhe mbështetjen e paqes në vendin tonë, rajon dhe në botë, si objektivi yni i përbashkët”. Në fund ministri Berisha i dhuroi majorit Murillo, mirënjohje dhe një dhuratë simbolike, që siç u shpreh ministri:



„është ikonë e identitetit tonë, e cila shpresojmë të zërë vend në koleksionin e dhuratave të çmuara prej Jush”.

Gjithashtu edhe komandanti i FSK-së, gjenerallejtënant Rrahman Rama falënderoi atasheun e Mbrojtjes të SHBA-ve, majorin Juan Murillo, për angazhimin profesional që ka dhënë për FSK-në. Me këtë rast, komandanti i FSK-së, gjeneral Rama i dhuroi medalje për Shërbim Meritor, majorit Juan Murilo. Ndërkaq, majori Murillo, falënderoi ministrin Berisha,

komandantin e FSK-së, gjeneral Ramën, si dhe të gjithë stafin e ministrisë dhe FSK-së, për bashkëpunimin dhe mundësinë që i afrian për të kontribuar për FSK-në. Ai veç tjerash shtoi: „Gjatë këtyre tri viteve kam mësuar shumë në lidhje me FSK-në dhe jam munduar të jap kontributin tim në avancimin dhe zhvillimin e FSK-së. Para së gjithash, dua të falënderoj FSK-në për organizimin e kësaj ngjarjeje dhe jam i nderuar me gjithë këtë pjesëmarrje sot”.

## Fetah Zejnullahu përfundoi me sukses shkollimin njëvjeçar në SHBA



Rreshter majori i Forcës së Sigurisë të Kosovës (FSK) Fetah Zejnullahu, gjatë këtij muaji, diplomoi në El Paso në Akademinë e Rreshter Majorëve në SHBA, duke treguar suksese të jashtëzakonshme si në nivelin akademik, poashtu edhe në atë fizik. Rezultatet e përgjithshme akademike të rreshter majorit Zejnullahut ishin mbi 90%, kurse në aktivitetet fizike ishte i vetmi student ndërkombëtar që në testin e fitnesit fizik arriti mbi 300%. Zejnullahu gjatë shkollimit të tij një vjeçar në SHBA mori pjese në tri gjysmë maratona vrapimi; Bataan March 40 K, Harlbou

Challenge, Norwegian Foot March 30 K dhe shumë aktivitete tjera fizike e poashtu edhe akademike. Gjithashtu Rreshter majori Zejnullahu përfundoi me sukses kursin Commandan Pre-Command Course, si dhe mori shumë lëvdata dhe shpërblime si nga stafi akademikë po ashtu edhe nga studentët amerikanë. Në United States Army Sergeant Major Academy përfunduan studimet “Klasa 68” me gjithsej 712 nënoficerë nga shumë vende të ndryshme. FSK-ja është përfaqësuar nga nënoficerë të saj në këtë Akademi që nga viti 2012.

## FSK-ja, forcë në shërbim të të gjitha komuniteteve

Në bazë të Planit të Veprimit për vitin 2018 të Departamentit për Bashkëpunim Civilo-Ushtarak të Ministrisë për Forcën e Sigurisë së Kosovës, FSK-ja, përkatësisht pjesëtarët e Batalionit të Xhenios, më 07 qershor 2018, kanë realizuar një projekt humanitar në Komunën e Graçanicës, i cili kishte të bënte me prerjen e disa plepave të thatë që paraqisnin rrezik për banorët e kësaj ane. Aktivitetet për realizimin e këtij projekti i përcollën nga afër edhe drejtori i Departamentit të BCU-së, Hajrush Kurtaj, majori Limon Salihu dhe zyrtarja nga Zyra për Komunitete në MFSK, znj. Lejla Loci. Projekti është realizuar në aksin rrugor Prishtinë-Gjilan, që kalon nëpër Graçanicë, ku janë prerë disa drurë të thatë të cilët rrezikonin jetën e qytetarëve dhe pengonin qa-

rkullimin e lirë të veturave.

Drejtori i BCU-së, z. Kurtaj, takoi edhe përfaqësuesit e Komunës së Graçanicës dhe disa banorë të komuniteti serb. Ai në takim me ta u shpreh; „FSK-ja me kapacitetet e saj gjithmonë do të jetë pranë komunitetit; pa marrë parasysh gjuhën apo fenë. Ne do t’ju dalim në ndihmë të gjithë qytetarëve me projekte që ndikojnë në përmirësimin e jetës dhe mirëqenies së tyre. Ndërkaq, qytetarët e Graçanicës u shprehën mirënjohjes dhe falënderues ndaj FSK-së. Ne do të jemi pranë komuniteteve; pa marrë parasysh gjuhën apo fenë, tu dalim në ndihmë dhe sidomos realizimin e projekteve të shumta, të cilat janë në të mirë të qytetarëve dhe që ndikojnë në përmisimin e jetës dhe mirëqenies së tyre.

## Marrëdhëniet Civilo-Ushtarake të FSK-së dhe KFOR-it mbajnë takimin për koordinim të aktiviteteve

Në ambientet e Ministrisë për Forcën e Sigurisë së Kosovës (MFSK), më 29 qershor 2018, u mbajt takimi i rregullt mujor i Departamentit për Marrëdhënie Civile-Ushtarake të FSK-së dhe udhëheqësve të njësive Marrëdhënies Civilo-Ushtarake (CIMIC) të KFOR-it që veprojnë në Kosovë. Me këtë rast, drejtori i Departamentit Civilo-Ushtarak, Hajrush Kurtaj i cili shprehu mirënjohjen për angazhimin dhe punën e vazhdueshme të CIMIC-ut të KFOR-it për përfshirjen e FSK-së në mbështetjen, projekte dhe aktivitete që realizon KFOR-i në të mirë të qytetarëve në gjithë territorin e Kosovës. Projektet dhe mbështetjet që FSK-ja ka realizuar në Maj-Qershor 2018, u

prezantuan nga zyrtari i CIMIC-ut të FSK-së, Agron Durmishi, i cili me theks të veçantë përmendi aktivitetet si; organizimi i kampit rinorë, angazhimi i FSK-së në rivarrimin e dëshmorëve në fshatin Marinë, përfundimi i projektit në prerjen e drunjëve në Graçanicë, mbështetjen me tenda për Qendrën Kombëtare të Transfuzionit të Gjakut të Kosovës si dhe angazhimin e FSK-së në shënimin e Ditës së Tokës etj. Nga ana e KFOR-it u vlerësua lartë angazhimi i FSK-së në mbështetjen dhe realizimin e projekteve humanitare për të gjitha komunitetet pa dallim. U konfirmua se CIMIC-u i KFOR-it do ta mbështes gjithnjë CIMIC-un e MFSK-se në realizimin e projekteve të përbashkëta.



# FSK-ja pjesë e aksionit për shënimin e Ditës Ndërkombëtare të Mjedisit

FSK-ja vite me radhë ka mbështetur aksionet për pastrimin e mjedisit kudo në Kosovë. Edhe kësaj radhe, FSK-ja ka angazhuar personel dhe pajisje xheniere në mbështetje të aksionit me moton “Ta pastrojmë Kosovën”, në shënimin e Ditës Ndërkombëtare të Mjedisit.

Manifestimi qendror për shënimin e kësaj dite u mbajt në fshatin Plemetin të Obiliqit, më 06.06.2018, ku të pranishëm ishin ministria e Mjedisit dhe Planifikimit Hapësinor Albena Reshitaj, kryetari i Obiliqit Xhafer Gashi, komandanti i Forcave Tokësore gjeneral brigade Enver Cikaqi, komandanti i Brigadës së Mbështetjes Operacionale gjeneral brigade Naim Haziri, ambasadori i Gjermanisë Christian Heldt, komandanti i Policisë së Kosovës për Obiliqin Sejdi Zeqiri, organizatori i kësaj ngjarjeje Luan Hasanaj, nxënës dhe qytetarë të shumtë të Komunës së Obiliqit.



Në fjalën e tij, komandanti i Forcave Tokësore gjeneral brigade Enver Cikaqi theksoi: “Sot kam kënaqësinë që së bashku me ushtarë, nënoficerë dhe oficerë po e mbështesim këtë aksion në shërbim të qytetarëve tanë. Obiliqi ka qenë dhe vazhdon të mbete prioritet ynë. Urime Dita Ndërkombëtare e Mjedisit, uroj që të kemi një ambient më të pastër në të gjithë Kosovën”. Organizatori i manifestimit z Luan Hasanaj i falënderoi të gjithë për mbështetjen e këtij aksioni. “Pjesëmarrja e juaj sot këtu, institucione dhe qytetarë, tregon se sa i rëndësishëm është ambienti, prandaj ju bëj thirrje të gjithëve që ta ruani dhe ta mbroni ambientin tuaj në të mirë të gjithë qytetarëve. Urime Dita Ndërkombëtare e Ambientit”. Në fund nga ministria e Mjedisit u ndanë mirënjohje për të gjitha institucionet që kanë ndihmuar në realizimin e këtij aksioni.

## Pjesëtarët e FSK-së u japin ndihmën e parë dy personave të aksidentuar në komunikacion



Një ekip i Forcës së Sigurisë të Kosovës, përkatësisht të Njësisë Ndërlidhëse për Reagim në Kri-za, përgjatë rrugës Prishtinë-Ranillug, afër Ranillugut, dje (27.06.2018) i ofruan ndihmën e parë në vendin e aksidentit dy personave civil të lënduar si pasojë e aksidentit rrugor, si dhe janë përkujdesur për të njëjtit derisa autoambulanca dhe personalitet mjekësor i ka

evakuuar për në spital. Ekipi i FSK-së, ishte duke udhëtuar për në Komunën e Ranillugut, ku FSK-ja rregullisht merr pjesë në takimet zyrtare për siguri në komunat e Kosovës. Pjesëtarët e FSK-së janë të trajnuar për ofrimin e ndihmës së parë, dhe ndihmës së parë në vendngjarje. Këto njësi shpesh kanë intervenuar dhe kanë shpëtuar jetë njerëzish, pra në raste aksidentesh, etj.

## Batalioni i Tretë i Reagimit të Shpejtë zhvilloi ushtrimin „Skifteri 01”



Kompania 3C e Batalionit të Tretë të Reagimit të Shpejtë të FSK-së ka përmbyllur trajnimin e gjenerimit të forcës i cili është zhvilluar nga 3 prilli deri më 28 qershor 2018, në territorin e dy komunave atë të Mitrovicës dhe Vushtrrisë. Kompania 3C të gjitha intervenimet i ka realizuar nga baza e përhershme e Batalionit të Tretë të Reagimit të Shpejtë pra, nga kazerma „Minatori” Mitrovicë. Operacionet përfundimtare

të ushtrimit fushorë „Skifteri 01” i përcolli edhe komandanti i Batalionit të Tretë të Reagimit të Shpejtë, nënkolonel Sylejman Cakaj, i cili i përgëzoi pjesëtarët për profesionalizmin, gatishmërinë dhe motivin e treguar gjatë realizimit të këtij ushtrimi, si dhe kërkoi nga ata të vazhdojnë më përkushtim kryerjen e detyrave edhe në të ardhmen. Qëllimi i këtij Ushtrimi ishte testimi i gatishmërisë së personelit të Kompanisë 3C në

intervenime gjatë operacioneve. Në këtë ushtrim ka marrë pjesë edhe Kompania 3B me 25 pjesëtarë si forcë opozitare, si dhe Kompania Mbështetëse dhe Ekipi Mjekësorë. Për më tepër ky ushtrim fushorë dëshmon që Batalioni i Tretë është i gatshëm dhe ka kapacitete që të zhvillojë operacione për t'u dalë në ndihmë të gjithë qytetarëve të Kosovës në Zonën e përgjegjësisë të cilën e mbulon.



## Qendra e Studimeve Universitare e FSK-së ka realizuar ushtrimin fushor “Kampi i Avancuar i QSU-së”

**Q**ëllimi i këtij ushtrimi ka qenë përgatitja taktike në operacionet urbane ofensive dhe mbrojtëse, si dhe testimi i gatishmërisë fizike dhe psikike të kadetëve. Gjatë realizimit të ushtrimit fushor, kadetët e QSU-së, u përballen edhe me temat si: operacionet urbane ofensive dhe mbrojtëse, navigim tokësor ditën dhe natën, patrullime, reagimi në kontakt, etj. Për të përcjellë nga afër ushtrimin fushor të kadetëve të Qendrës për Studime Universitare (QSU) më 7 qershor 2018, ishin: Komandanti i Forcës së Sigurisë së Kosovës gjeneralleteniant Rrahman Rama, komandanti i Forcave Tokësore gjeneral brigade Enver Cikaqi, komandanti i Komandës së Doktrinës dhe Stërvitjes gjeneral brigade Irfete Spahiu, zëvendëskomandanti i Brigadës së Mbështetjes kolonel Avdi Rraci, komandanti i Kampit Bondsteel, koloneli Nick Ducich si dhe oficerë të lartë të FSK-së. Filimisht për të pranishmit, kapiteni Vegim



Krelani, ushtrues detyre i komandantit të Qendrës për Studime Universitare, bëri një njoftim rreth angazhimit në ushtrimin fushor, qëllimin e këtij ushtrimi dhe njoftoi të pranishmit për aktivitetet, të arriturat dhe sfidat me të cilat janë përballur

kadetët e katër gjeneratave, gjatë këtyre ditëve në kampin fushor në Zhegoc.

Komandanti i FSK-së vlerësoi lartë punën e kadetëve në realizimin e ushtrimit dhe theksoi se: “Aktivitetet e juaja këtu kanë përparësitë por edhe sfidat, prandaj ju

pas përfundimit do të dilni me të gjeturat rreth mësimave të mësuara, kështu do të kemi mundësi të përkushtohemi në ushtrimet e radhës që mos të përsëriten këto mësimet të mësuara. Unë ju përgëzoj për punën dhe sukseset, e di që gjatë punës dalin edhe probleme dhe prandaj jemi këtu, për të parë nga afër punën tuaj. Këto aktivitete që po i zhvillonit tani në situatë paqeje kërkohet të jenë sa më reale, që në të ardhmen nëse paraqitet nevoja, të jeni të përgatitur të përballeni me sfidat”.

Komandanti i Komandës së Doktrinës dhe Stërvitjes gjeneral brigade Irfete Spahiu në shenjë falënderimi për kontributin e dhënë në vazhdimësi, ndau një mirënjohje për pjesëtarin e FSK-së Rreshter Fadil Rashiti, i cili ka lejuar mbajtjen e këtij ushtrimi për vite me radhë në pronat e tij dhe të familjes së tij. Kadetët për të pranishmit raportuan për angazhimin dhe demonstuan një ushtrim i cili u përcoll me interesim nga mysafirët e ftuar.

## Batalioni i Dytë i BRSH-së përfundoi me sukses ushtrimin „Reagimi i përbashkët 2018”

**K**ompania 2C e Batalionit të Dytë të Brigadës së Reagimit të Shpejtë (BRSH), në bazë të kalendarit vjetor të stërvitjes, ka realizuar trajnimin e brendshëm tre mujor, kurse më 25.06.2018, ka zhvilluar edhe ushtrimin fushor 48 orësh “Reagimi i Përbashkët-2018”, në Komunën e Gjakovës. Angazhimi i komandantit të Batalionit të Dytë, majorit Valdet Berisha së bashku me pjesëtarët e FSK-së, në këtë trajnim është vlerësuar lartë nga zv. komandanti i KFT-së, gjeneral brigade Xhevahir Geci, komandanti i Brigadës së Reagimit të Shpejtë gjenerali Fadil Hadergjonaj, kryetari i komunës Ardian Gjini, oficerë të Brigadës Shumëkombëshe të Lindjes dhe kontrollues-vëzhgueseve të KDS-së. Pjesë e këtij ushtrimi fushor kanë qenë njësitë e specializuara të RMC/FSK-së, si Kërkim-Shpëtim (KSH) në Male, Ujëra, Urbane, Materiet Kimike-Atomike-Biologjike (MKAB) dhe Njësia Ndërlidhëse në Reagim në Kriza

(NJNRK) si dhe autoritetet lokale përfshirë Drejtorinë për Emergjencë, Policinë e Kosovës, Kryqin e kuq, Zjarrfikësit, QKMF-Gjakovë, si dhe Brigadën Shumëkombëshe të Lindjes. Gjatë këtij ushtrimi që ishte produkt i trajnimit tre mujor, pjesëtarët e FSK-së dëshmuar se janë të përgatitur profesionalisht në operacionet ushtarake siç janë: Rikonicion të terrenit, Patrullimet me blinda, kordon-kërkim, Mbrojtje gjatë marshimeve rrugore, perimetër të sigurisë, Kërkim-shpëtim në ujëra, male, urban dhe MKABK (evakuim me helikopter), Aksident trafiku e tjera. Gjatë planifikimit dhe zbatimit të këtij ushtrimi fushor çdo detaj ka funksionuar në bazë të procedurës së udhëheqjes së trupave. Për më tepër ky ushtrim dëshmoi që BRSH-ja është përgatitur dhe ka kapacitet të mjaftueshme për realizimin e operacioneve të sigurisë/operacioneve humanitare në koordinim me autoritetet lokale dhe forcat e NATO-s, për të real-



izuar qëllimin e komandantit të Batalionit të Dytë. Qëllimi i trajnimeve është mbajtja e nivelit të gatishmërisë të Batalionit

të dytë të FSK-së dhe bashkëpunimi me autoritetet lokale, njësitë e specializuara të FSK-së dhe KFOR-in.

## FSK-ja mbështet Qendrën Kombëtare të Transfuzionit të Gjakut



**Q**endra Kombëtare e Transfuzionit të Gjakut në Kosovë, për nder të Ditës Botërore të Dhurimit të Gjakut (14 qershorit) sot (20.06.2018) në sheshin „Nënë Tereza” në Prishtinë, ka organizuar javën e dhurimit vullnetar të gjakut. Java e dhurimit vullnetar të gjakut ka filluar më 18.06.2018 dhe do të përfundojë më 22.06.2018. Për rëndësinë që ka sigurimi në kohë i gjakut dhe produkteve të tij, gjatë kësaj jave do të jetë në fokus edhe falënderimi për të gjithë dhuruesit vullnetarë të gjakut të cilët me dhurimin e gjakut të tyre shpëtojnë jetë çdo ditë. Këtij aksioni vullnetar iu bash-

kuan shumë pjesëtarë të FSK-së, qytetarë të shumtë, kalimtarë të rastit, por edhe grupe të organizuara që me vullnetin e mirë i ishin përgjigjur këtij aksioni FSK-ja, si çdo vit edhe këtë vit e ka mbështetur Qendrën Kombëtare të Transfuzionit të Gjakut me mjete logjistike. Në sheshin „Nënë Tereza” ka ngritur një tendë për të gjithë vullnetarët që dhurojnë gjak. Aksionit iu përgjigjën një numër i madh i pjesëtarëve të FSK-së, të cilët edhe përgjatë vitit në mënyrë të organizuar dhurojnë gjak. Qindra doza gjak grumbullohen nga këta pjesëtarë për nevojat e Qendrës Kombëtare të Transfuzionit të Gjakut të Kosovës.